

دائرة مخصوصه

در سعادتده باب عالی جوارنده

محل اداره :

# مشرط افق

اخطار :

مسلكمزه موافق آثار جديده مع المنويده

قبول اولور

درج ايدهلن آثار اعاده اولتاز

ديده، فلسفه، علوم، حقوق، ادبياتده و سياستمانده و بالخاصه كرك سياسى و كرك اجتماعى و مدنى احوال و شئونه اسلاميه در بحث ايدر و هفته ده بر نشر اولنور.

آبونه بدلى

صاحب و مؤسسلى :

در سعادتده نسخه سى ۵۰ پاره در

ابوالعلا زين العابدين - ح . اشرف اديب

سنه لكى

التى آيلنى

|                   |       |     |     |       |
|-------------------|-------|-----|-----|-------|
| ممالك عثمانيه     | ايچون | ۸۰  | ۴۰  | غروش  |
| روسيه             | »     | ۶۰۵ | ۳۰۵ | روبله |
| سائر ممالك اجنبيه | »     | ۱۷  | ۹   | فرائق |

تاريخ تأسيسى

۱۰ تموز ۳۲۴

قيراهلن متوا بورو ايله كوندريليرسه سنوى  
۲۰ غروش فضله آلنير

عدد : ۶۳

۴ ذى القعدة ۳۲۷ پنجشنبه ۵ نشرين ثانى ۳۲۵

اوچنچى جلد

مومی الیه)، (پوسته خانه عامره)، (حسن قوروتی) کبی یاوه لرله کولونج اولمقدور.

بختی بوقدر اوزانديغمز اصل اسم ايچنده کي نوعلردن بری ده (مصدر) دیدیکمز اسملردر. مصدر بوتون فعللرک وبرجوق اسملرک کوکی وآناسیدر. مثلاً (ایسته مک)، (طوتمق) مصدرلرندن، (ایسته دی)، (ایسته مش)، (ایسته ر)، (ایسته یور) وسائر کبی بالعموم فعللرله (ایسته ک)، (طوتمه)، (طوتوش)، (طوتوم)، (طوتام)، (طوتو)، (طوتاماق)، (طوتافون)، (طوتوق)، (طوتاق)، (طوتوجی)، (طوتولان) کبی برجوق اسملر چیقار. بوجاللز مصدرک اسم اولماسنه مانع دکلدر. باقیلسه الک خالص مصدر، (ایسته)، (طوت) کبی اداتدن پوروزدن، فضله هرشیدن قورتولمش اولان فعل ماده لریدر. فقط بونلرک بویایه کی یاننده برده بخذوری وار.. بونلردن زمان وشخص آیریلایور.. (ایسته دیندی، مطلقاً بونک ایچنده (شمدی) و(سن) معنای چاره سزاولیور. بوسیلله (ایسته مک) (طوتمق) کبی (مک)، (مق) اداتلی کله لر مصدر یرنده قالیور. چوجوقلره (مصدر خفیف) و (مصدر ثقیل) دیه اوکرته کلدیکمز اصل مصدرک یاننده (ایسته مکک)، (طوتمقلق) و (ایسته مه)، (طوتما) و (ایسته یش)، (طوتوش) و (ایسته ک)، (طوتوم) شکللرند طانیديغمز (مصدر تأکید)، (مصدر تخفیف)، (حاصل مصدر)، (اسم مصدر) کبی شیلردن باشقه جه بخته محل بوقدر. مصدردن طبیعتیله فعللرده بحث اوله ناجق.

تکرارایده ایده قارحلواسنه چویردیکمز اسم واسمک دوکوتیلری بختی بوقدرله کسوب، مساعده کنزله بش دقیقه تنفس ایده لمده، آرتیق فعل بختنه آتلايالم. مابعدی وار

### دوقتورا حقنده

— مکتب حقوقدن، ابراهیم علاءالدین بکه —

صراط مستقیمک «۶۲» نومرولی نسخه سنده مندرج «دوقتورا حقنده» سرلوحه لی مقاله کزی — مسئله نک کنینه قطعاً جهت تعلق بولمایان — عادل بر شخص ثالث بیطرفلیله اوقودم.. «بنای اجتماعینک تملی عدالتدر» و «دوقتورا اساسی اعتباریله مصون - الاعتراضدر» کبی بعض مطالعه لریکز فی الحقیقه آزاده سنک اعتراض اولسه ده، اوسطرلرک هیئت مجموعه سی بنده کزک فکریمه کوره ناقض وبلکه یک نابجا اولدینی ایچین شو برقاچ سطرله، بوخصوصه، سرد مطالعه ایتمک مجبوریتند بولئیورم..

نهایت.. اساساً حقائق ابتدائیهدن معدود اولمقله برابر، برجوق سنه لر تمادی ایدن آجی آجی تجارب عدیده نتیجه سننده، تا صوک طبقه عوامه وارنجیه قدر آراق هرکس آکلادی وقائع اولدی، که معمور وبقایاب اولمق ایسته یین برملکتده الک اول و جودی الزم اولان شی عدالتک تأسیسی، حقک ظلمه، حتی هرشیته غلبه سیدر.

برحکومتده عدالت مفقود، حق محقر، مردود اولورسه — وارسته اشتباهدرکه — او ملکک استقبالی مظلم، مظلم دکل مؤلدر.. شو حقائق ظاهره سزجده مسلم ایسه قضیه نک بوتون زاکت

وعلوتی هرزمان، هریرده حق مرتبه لایقنده طوتاجق، عدالتی توزیع واطریق ایده جک مأمورین عدلیه توجه ایدر. بناء علیه مملکت مزده مأمورین عدلیه یتشدیرمکه مشغول اولان مکتب حقوقزه برآز عطف نظر ایتمک ایجاب ایدیور..

فی الواقع مکتبمز اوتهدنبری «دورسابقک سیاتی» جمله سی آلتده جمع اولنه بیان اسباب عدیده دن ناشی صورت مطلوبه ده، لازم اولدینی قدر طلبه لر پرورده ایده مامش. فقط، عجا ناصل اولمش ده اووقتلیر برجوق، ایکی سنه قدر امتداد ایدن دوقتورالر (!) اونقصانی ازاله یه خادم اولامایه رق صحت طلبه یی اخلاص ایتمک کبی سوزشلی نتیجه لر تولید ایتمش؟!.. ایسته بومعمای حل ایتمک محتاج کر امتدر، بن ظن ایدیورم، که مکتب حقوقدن بحق حقوقشناس مقتدر کنجلیر یتشدیرمک دوقتورا ارتجاعیله دکل، متخصص واصل تدریسه واقف معلملر تعیینیه ممکن اولور.. یوقسه دور استبدادک متاع مبتدلی اولان کنارلری یالیزلی توصیه لرله التماسنامه لر حامللرینه بررجحان فوق العاده تأمین ایندکجه تدرس وتبعلیه مشغول اولدیغمز قوانین، محترم معلملریمز طرفندن ماده ماده قرائت ایدیلرک شرح وتدریس ایدلمکده دوام اولندکجه ونهایت خامه ناجیزمک تحریرنده دوچار شرم اولدینی برجوق احوال مؤسسه یه خاتمه ویرانه کجه اوسیوری، کسکین، پارلاق ذکالر، انکشاف ایچون برزمان، برزمین مساعد بکله یین اوبویوک دهالر بردکل اوچ، بش، اون دوقتورایه (!) تابع طوتلسه لرده نتیجه ده ضرردن باشقه برشی کوریه مز..

کرچه برطاقم معقول شرائط معتدله داخلنده دوقتورا وضعی مسامحه کار برنظرله کوروله بیلور. فقط، بوده حصول مقصودنا کافی اوله جنی ایچین البته بی لزومدر.

ذاتاً (تمز) سز دوقتورا دنیانک هیچ برمحله تصادف اولنور حالات غریبه دن دکلدر. بوندن ماعدا ایوم، اوتوز اوچ سنه قهار برینجه ظلم واعتساف آلتده پریشان اولمش اوتوز میلیون خلق شمدی حکومت مشروطه دن، هرشیدن اول، عدالت ایسته یور، عدالت بکله یور.. وبواونلرک یک بویوک ومقدس برحقیدر.

حالبوکه مارتدن اعتباراً دیگر بعض قضالرده تطبیق وتشمیلی الزم ومقرر اولان تشکیلات عدلیه بالنرض بوکوندن اعتباراً وضع اولنه جق دوقتورا ایله — مأمور اوله بیلله جکلرک فقدانندن ناشی — چار ناچار برسنه دوچار تأخر اولمق ایجاب ایدر. بویسه شایان تجویز بر کیفیت دکلدر.. ایسته مسئله یه بوکبی ملاحظات ده انضمام ایدنجه، مادامکه مملکت مزده — ممالک غریبه ده اولدینی کبی — صنف مخصوصلر احداثیه دوقتورا وتیز امتحانلرینک تطبیق واجراسی مع التأسف ممکن اولامایور، هر حالده کورو کورونه بر دوقتورا (!) وضعندن ایسه مکتبمزک اصلاح حالنه چالیشیله رق ممکن مرتبه اکمال نواقصه عنم ایتمک مأمورین عاذه سنه مرتب بر وظیفه، بر دیندر، که از هرجهت او دوقتورا مضحکه سنه راجحدر..

مکتب حقوق منتهی صنفندن:

مصدر غیبی: احمد ریا

مطبعة خیریه وشرکاسی

مدير مسئول: اشرف ارب